

## **Gereformeerde Kerk Bellville – 2 Oktober 2016 – Oggend**

**Sing vooraf staande:** Skrifberyming 16-1:1, 2 (15:1, 2))

- 1 “Laat jul kinders tot My nader / en geen hindernis hul weer,  
want die koninkryk der heemle / is hul erfdeel,” sê die HEER.
- 2 “Wie nie needrig soos die kindjie / wat hier tussen julle staan,  
so die Godsryk wil ontvang nie, / sal daar geensins binnegaan.”

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

**Amen.**

Lofpsalm 97:1, 7 (p. 484)

- 1 God heers as hoogste HEER; / die aarde moet Hom eer,  
en juig, saam met die strande / van afgeleë lande.  
Daar's wolgedonkerheid / rondom sy majesteit;  
sy rykstroon is gestig / op oordeel en gerig / en op geregtigheid.
- 7 Gods vriend'like aangesig / straal vrolikheid en lig  
deur duisternis en smarte / vir alle opregte harte.  
Regverdiges, wees bly! / En sing 'n lied daarby!  
Verheug u in die HEER! / Lofsing sy Naam tot eer, / Hy's hoog en heilig, Hy!

Geloofsbelydenis: Apostolicum

Wet

Psalm 25:5, 6 (p. 116)

- 5 Ja, Gods weg is goedheid, klaarheid, / en sy weg altyd getrou  
vir wie wandel in sy waarheid / en op sy beloftes bou.  
Wil my dan, u Naam ter eer, / al my sondeskuld vergewe;  
want ek het teen U, o HEER, / swaar en menigmaal misdrewe!
- 6 Wie's die man wat hier benede / in Gods vrees sy weg wil gaan?  
God sal self sy wank'le skrede / voortlei in die regte baan.  
Al wat goed is, sal Gods hand / hom in stilheid laat verwerwe;  
en die lank beloofde land / sal sy nageslag beërwe.

Gebed

Psalm 8:1, 2 (p. 30)

- 1 Daar is geen land so ver of woës geleë, / geen strand, o HEER, of wilde waterweë,  
geen hemelsfeer in die oneindigheid – / of orals blink u Naam en majesteit.
- 2 U het, o HEER, wat troon oor alle dinge, / uit kindertaal en stem van suiglinge  
u mag gegrond, sodat die mens moet swyg / wat, hoog van hart, uit wraakbegeerte dreig.

**Skriflesing:** Psalm 8

**Kernverse:** Psalm 8:2-3

**o HERE, onse Here, hoe heerlik is u Naam op die ganse aarde! U wat u majesteit gelê het op die hemele. Uit die mond van kinders en suiglinge het U sterkte gegrondves, om u teëstanders ontwil, om die vyand en wraakgierige stil te maak.**

(Psalm 8:2-3 AFR53)

## **Tema:** God laat alles en almal sy majesteit sien om Hom te aanbid

Geliefde gemeente van ons Here Jesus Christus, wanneer 'n mens jonk is, het jy al hierdie drome van die dinge wat jy graag in die lewe wil bereik. En dit is ook reg so. Die Here het aan elke mens talente gegee om te ontwikkel en te gebruik. Hoe ouer 'n mens word hoe meer kyk jy terug op jou lewe om te sien wat jy nou eintlik in die lewe bereik het. Jong mense kyk vooruit en sien uit na die dinge waarvoor ander mense hulle sal onthou. Ouer mense kyk terug om te sien of daar iets in hulle lewe is waarvoor ander mense hulle sal onthou.

Jong mense en ouer mense kyk met dieselfde vraag in hulle oë: Wat is regtig belangrik in hierdie lewe? Wat is daar wat ek kan doen wat enduit onthou sal word? Vir die mense wat in Jesus Christus glo, gaan dit egter nie net daarvoor waarvoor mense hulle gaan onthou nie, maar wat die Here Jesus op die laaste dag in herinnering gaan roep in hulle lewens. Watter betekenis het 'n mens se lewe op die laaste dag wanneer Jesus Christus die lewendes en die dooies gaan oordeel?

Die betekenis van 'n mens se lewe kan net gemeet word in die lig van 'n mens se verhouding met God deur Jesus Christus. Sonder Christus kan 'n mens nie in 'n lewende verhouding met God wees nie. Dit is eers wanneer 'n mens in hierdie lewende verhouding met God is dat die mens kan agterkom waar sy lewe in God se plan inpas. Sodoende kom hy agter wat die Here se doel met sy lewe is. Wanneer 'n mens dit weet, kry die mens se lewe werklik betekenis.

Broers, susters en kinders, in Psalm 8 word die tema van God se majesteit en heerlijkheid teenoor die mens se kleinheid en nietigheid verken. Terselfdertyd weet ons ook dat God die mens na sy beeld geskape het. En in hierdie psalm hoor ons dat die Here aan die mens

die opdrag gee om oor sy handewerk te heers. Omdat Dawid die majesteit van God aan die een kant opgemerk het en aan die ander kant die nietigheid van die mens tesame met die groot verantwoordelikheid wat die mens het, het hy aan die begin en einde van die psalm uitgeroep:

**o HERE, onse Here, hoe heerlik is u Naam op die ganse aarde!**  
(Psalm 8:2, 10 AFR53)

Wanneer Dawid van die Naam van die Here praat, verwys hy na die volheid van God se eienskappe en die grootsheid van sy werke. Met ander woorde, die Naam van God verwys na wie God is en wat Hy gedoen het soos wat dit in die Woord geopenbaar word. Die heerlijkheid van die Here se Naam is op die hele aarde en sy majesteit is in die hemel gevestig. Hierdie woorde herinner sterk aan wat Paulus baie later in die brief aan die Romeine geskryf het:

**Van die skepping van die wêreld af kan 'n mens uit die werke van God duidelik aflei dat sy krag ewigdurend is en dat Hy waarlik God is, hoewel dit dinge is wat 'n mens nie met die oog kan sien nie. Vir hierdie mense (die ongelowiges) is daar dus geen verontskuldiging nie, ... (Romeine 1:20 AFR83)**

Die mense wie se oë en harte deur die Heilige Gees aangeraak is, die mense in wie die Gees die geloof gewerk het, is in staat om die grootheid en almag van die Here raak te sien in sy werk. Die Heilige Gees het aan hulle die geloof geskenk omdat die Here Homself in sy verbond innig en persoonlik aan hulle verbind het. Die almagtige God, die

Skepper van hemel en aarde, het 'n persoonlike en intieme verhouding met sy mense begin sodat sy Gees hulle oë kon laat sien hoe groot en heerlik hulle Here se Naam is.

Oor die hele aarde weerklink ons Here se groot en heerlike Naam deur sy skepping. Aan die hemelruim wat die hele aardebol omspan het ons Here sy majesteit – sy koninklike heerskappy – vasgelê. Die Here laat die son elke oggend opgaan om die aarde te verlig. Die Here het die aardebol op sy presiese hoek gekantel sodat die son 'n vaste pad daar rondom het en die seisoene mekaar kan afwissel.

Die Here het die waters bymekaar gemaak soos in 'n net om dit in sy skatkamers te hou. Hy maak die deure van sy skatkamers oop op die tyd wat Hy bepaal het om selfs 'n droë en dorre land sopnat te maak sodat daar groen gras kan uitspruit. Hy hou die donderwolke

en weerligstrale vas tot op die regte tyd wanneer dit die aarde moet tref.

En in die aandskemering beskilder die Here die lugruim met allerhande kleure van die reën-boog wanneer die son sy laaste strale oor die westelike horison laat gaan. Dan is dit nog nie die einde van ons Here se majesteit nie. Hy het die Suiderkruis in die sterrehemel vas-gemaak sodat die mens selfs in die nag koers kan hou. Hy het die maan 'n vaste baan om die aardebol gegee sodat die waters van die see hoog en laag kan styg en daal. In die grootsheid van sy skepping getuig die Here van Homself. Sy Naam is groot en heerlik oor die hele aarde.

Maar die Here gebruik nie net die grootsheid van sy skepping om die heerlijkheid van sy Naam sigbaar te maak nie. Hy gebruik ook kinders en suigelingte om van sy majesteit te getuig. Daar in ma se arms lê 'n klein babatjie rustig en slaap – 'n bitter klein mensie – en hy lewe. Daar is 'n hartjie wat klop en longetjies wat kan asemhaal. Elke deeltjie van daardie babatjie is so volmaak deur ons grote God aanmekaar geweef sodat daardie babatjie kan leef en grootword. Geen mens is in staat om met sy hande 'n mensie aanmekaar te weef wat groei en grootword nie. Net die Here alleen kan dit doen.

En dan gaan die Here nog verder. Sy Gees gee aan kinders die geloofsoortuiging dat hulle mag weet en vertrou dat die Here ook hulle God is. Hy gee aan hulle verstand om te begryp dat Hy almagtig is. Hy gee aan hulle die vaste vertrouwe dat Hy ook hulle getroue hemelse Vader is. Hy gee aan kindertjies 'n mond om sy lof te besing en om teenoor elke mens te getuig dat die Here alleen groot en goed is. Die Here laat die heerlijkheid en grootheid van sy Naam weerklink uit die bestaan van 'n klein babatjie en uit die mond van klein kindertjies sodat sy vyande en teëstanders verstom staan.

Op die Sondag voor sy kruisiging het Jesus na die tempel gegaan. Eers het Hy die tempel gereinig van almal wat daar handel gedryf het. Toe het Hy die blindes en kreupeles genees. Die kinders wat dit gesien het, het uitgeroep: Prys die Seun van Dawid! Die skrifgeleerdes en priesterhoofde was hieroor verontwaardig. Maar Jesus het sy vyande geantwoord:

**Ja, het julle nooit gelees: Uit die mond van kinders en suigelingte het U vir U lof berei nie? (Matteus 21:16 AFR53)**

Die Here maak sy vyande stil deur die lof wat kinders en suigelingte aan Hom toebring. Sien jy ook die heerlijkheid van die Here se Naam raak? Hy is die almagtige God en Hy is ons Here omdat Hy Homself aan ons verbind het.

Saam met Dawid staan ons in verwondering. Ons kyk op na die hemel en sien die Here se magtige werke raak. Ons kyk na die wonder van 'n klein mensie in ons arms wat lewe en groei. En die verwondering word groter as ons voor die geheim van ons eie bestaan te staan kom. Ons sien al hierdie grootse werke van die Here raak en vra:

**wat is die mens dan dat U aan hom dink, die mensekind dat U na hom omsien?**  
(Psalm 8:5 AFR83)

In die grootheid van God se hele skepping is ek en jy maar spikkeltjies, stofdeeltjies wat nie eers die weegskaal se naald kan beweeg nie. Tog het die Here ons net 'n bietjie minder as 'n hemelse wese gemaak. Saam met die engele is ons skepsels uit die hand van die Here. Tog is ons teenoor die engele net daarin minder dat ons nie nou al in die direkte hemelse teenwoordigheid van God kan wees nie. En hoewel ons nietige skepsels is, dink die Here aan ons en sien Hy om na ons.

As die Here aan die mens dink, is dit nie maar net 'n mooi herinnering aan die volmaakte mens wat Hy doer in die verre begin gemaak het nie. As die Here aan die mens dink, is dit 'n daad van genade, 'n daad wat sigbaar en hoorbaar word. Ja, die Here onthou dat die mens eenmaal volmaak was, maar toe het hulle daarna in sonde geval. En die Here het aan sy mense gedink. Hierdie gedagtes van God het daad geword in Jesus Christus.

Die Seun van die lewende God het mens geword. Hy is as klein babatjie gebore in hierdie stukkende wêreld om met sy heilige en volmaakte lewe die onvolmaakte en onheilige lewe van 'n klein babatjie voor die aangesig van God te bedek. Die Seun van God het mens geword om die hoogste prys vir elkeen van God se mense te betaal. Met sy kosbare bloed het Hy gelowiges losgekoop uit die heerskappy van die duiwel en uit die heerskappy van hulle eie sondige geaardheid. Hy het die dood oorwin om die nuwe lewe vir hulle te verwerf.

Nou gaan die Here ons God nogeens verder. Hy sien om na mensekinders. Hy belowe sy Heilige Gees aan hulle om hulle in die nuwe lewe te begelei. Met die Woord van die Here regeer en lei die Heilige Gees hulle. Hy lei gelowiges op die pad van volmaakte gehoorsaamheid aan Christus langs die weg van selfverloëning en vernedering.

Hoekom dink die Here so aan die mens? Hoekom sien Hy om na die mensekind? Hy doen dit, want Hy het die mens met eer en heerlijkheid gekroon. Die Here gee aan die mens aansien, want Hy plaas in die hand van die mens die gesag om oor sy skepping te regeer. Die Here vertrou sy handewerk aan mense toe. Die Here gee sy handewerk in die hande van mense en Hy weet hierdie mense se hande is broos. Hy weet ook dat hierdie mense aan wie se hande Hy sy werk toevertrou, is mense wat geneig is om net mooi die teenoorgestelde te doen van wat Hy verwag. En tog sê Hy vir die mens: heers oor my skepping, pas my skepping op en bewerk my skepping.

Pa en Ma, julle wat julle kind vanoggend bring om gedoop te word, in julle hande het die Here daardie wonderwerk van 'n mensie geplaas. Aan julle het Hy sy Heilige Gees gegee. Deur sy Gees en Woord gee die Here alles wat julle nodig het om daardie kindjie van die Here groot te maak. Hy het julle verlos en sy kinders gemaak omdat Hy met julle 'n persoonlike verhouding het. Hy doop vanoggend sy kind om vir julle en vir ons almal te wys dat Hy ook met daardie kindjie 'n persoonlike verhouding het. En nou gaan julle vanoggend ten aanhore van die hele gemeente vir die Here belowe dat julle daardie kindjie sal grootmaak en opvoed sodat hy die Here sal ken en liefhê. Maak dan nou daardie kindjie groot, want deur julle opvoeding wil God julle kind gebruik om sy lof en heerlijkheid te besing. Met die mond van julle kind wil God sy teëstanders tot stilswye bring.

En geliefde gemeente, nou sê die Here nie maar net vir hierdie doopouers dat hulle hulle verbondsbelofte moet nakom nie. Hy praat ook met jou en met my oor die kinders wat Hy onder ons sorg geplaas het. Vanoggend herinner die Here ons ook aan die belofte wat ons aan Hom gemaak het toe ons kinders gedoop is. Voed ons nog ons kinders so op dat hulle ons Here kan liefhê en vertrou? Onderrig ons hulle nog in die Woord van die Here sodat hulle hulle geloof ten aanhore van die hele wêreld kan bely en so die heerlijkheid van ons Here se Naam kan besing?

Broers en susters, daar is nog meer. Ons is nie maar net toeskouers van hierdie kindjie se doop nie. Ons is nou saam met die ouers gebind aan hulle belofte, want ons is getuies van hulle belofte. Hierdie ouers en hulle kind is ook in die hande van die gemeente gegee. En aan ons almal gee die Here die verantwoordelikheid, Hy bekroon ons met eer en aansien sodat ons na mekaar sal omsien. Gelei deur die Heilige Gees moet ons met die Woord van die Here mekaar bystaan in die opvoeding van die kinders. Daarom moet ons mekaar met raad en daad bystaan en ook vermaan indien dit nodig is. Geliefdes, ons moet ons broers en susters toelaat om ons te help en te vermaan, want ons is in mekaar se hande gegee deur die Here.

Met die opvoeding van ons kinders gaan dit nie net oor hulle geloof in God en Christus soos wat dit tot uitdrukking kom hier in die erediens of by katekisasie of by huisgodsdienst nie. Ons verhouding met God is mos nie net 'n klein deeltjie van ons hele lewe nie. Ons geloof in ons Here neem ons hele lewe in beslag. Ook hoe ons met die diere en plante van die Here omgaan, is uitdrukking van ons verhouding met God. Die Here gee mos sy hele skeppings-werk in ons hande om daarvoor te heers, dit op te pas en dit te bewerk. Ook hoe ons van ander mense en met ander mense praat is uitdrukking van ons verhouding met God. Christus se volmaakte en heilige lewe bedek mos nie net ons kerklike lewe voor die aan-gesig van God nie maar ons hele lewe. Die Heilige Gees regeer en begelei ons in die nuwe lewe in Christus nie net wanneer ons die Bybel in die hand het nie, maar ook daar waar ek met die hele skepping van God te doen het.

Geliefdes, as ons regtig iets betekenisvol in ons lewe wil doen – iets wat deur ander mense onthou sal word – dan is dit om die Here se Naam met ons woorde en daede groot te maak en te verheerlik. Pa en Ma, mag julle deur die Gees gelei word dat julle 'n seun kan agterlaat wat die Here net so prys soos julle en nog beter.

**Amen!**

Slotgebed

Formulier vir die bediening van die heilige doop aan kinders

Doop

Psalm 105:1, 5 (p. 514)

- 1 Loof, loof die HEER van alle here! / Verhoog sy Naam en gee Hom ere,  
en bring sover daar volke is, / sy daede in gedagtenis;  
en spreek met aandag en ontsag / van al sy wonders, dag aan dag.
- 5 Die HEER wat van geen wankel weet nie, / sal nimmer sy verbond vergeet nie;  
al sy beloftes bly van krag / tot in die duisendste geslag.  
Verbond met Abraham, sy vrind, / bevestig Hy van kind tot kind.

Psalm 8:4, 5, 7 (p. 31)

- 4 wat is die mens dan dat U hom gedenk het, / die mensekind wat U so ryk beskenk het!  
Met eer en heerlijkheid is hy gekroon, / skaars minder as die eng'le om u troon.
- 5 U laat hom heers. Tot aan die verste strande / gebied hy oor die werke van u hande.  
U het, o HEER, dit onder hom gestel, / dit hoor sy stem en beef voor sy bevel.
- 7 Ja, daar's geen land so ver of woes geleë, / geen strand, o HEER, of wilde waterweë,  
geen hemelsfeer in die oneindigheid – / of orals blink u Naam en majesteit.

Die HERE sal jou seën en jou behoed;  
Die HERE sal sy aangesig oor jou laat skyn en jou genadig wees;  
Die HERE sal sy aangesig oor jou verhef en aan jou vrede gee.

**Amen.**

Ds Coen Vrey  
Gereformeerde Kerk Bellville  
2 Oktober 2016